

No. 593. 1369. 8. Juli.

*Die Markgrafen Friedrich, Balthasar und Wilhelm überlassen für 2000 Schock Gr. dem Bischof 200 Schock Gr. Jahreszinsen in den Städten Grossenhain, Meissen, Torgau und Leipzig auf Wiederkauf.*

Wir Friderich, Balthazar vnd Wilhelm — bekennen — daz wir mit wolbedachten müte vnde guten vorrate dem erwirdigen in got vater vnde herrn hern Johann byschoffe zcū Mißen vnde sine capitel vnde sinen nachkomeligen byschoffen zcū Mißen haben vorkouft zewen hūndirt schog groschin prager muncze ierlichis zcinsis vmbe vier vnde zewenczig hundirt schog groschen prager muncze, der her vns iczunt genzlichen vnde zcū male bezalt hat, vnde wir sie in vnsirn nucz gewant haben, vnde sagen yn der ledig vnde los in disim brieue, vnde die ym alle iar vnde sine capittel ab nicht byschoffis were vnde sinen nachkomeligen in vnsern nach beschriben steten sullen geuallen, zcū dem Hayn an der stat fūmfzig schog halb vf sende Michels tag der schirst komit vnde halb vf sende Walpurgen tag der darnach volgit, zcū Mißen an der stad fūmfzig schog halb vf sende Michels tag der schirst komit vnde halb vf sende Walpurgen tag der darnach volgit, zcū Torgow an der stat vierzig schog halb vf sende Michels tag der schirst komit, halb vf sende Walpurgen tag der darnach volgit, vnde an der stat zcū Lipczk sechzig schog groschen allis prager muncze halb vf sende Michels tag der schirst komit vnde halb vf sende Walpurgen tag der dornoch komit; vnde wo ym adir syme capitel ab nicht byschoffis were adir sinen nachkomeligen an den selben vorgeantent czinß icht abe ginge adir nicht enwerde volliglichen, so sullen wir vnde wollen ym vnde sine capitel ab nicht byschoffis were vnde sinen nachkomeligen den zcins selbir gebin vnde erfüllen, wenne wir dorumb gemanit werdin, also daz ym vnde sine capitel ab nicht byschoffis were vnde sinen nachkomeligen nicht doran sal abe gehen nach gebrechen. Daz globen wir ym in guten truwen ane allirleye argelist vnde geuerde. Ouch so hat der selbe vnser herre er Johann byschof zcū Mißen vns die gūnst vnde gnade durch vnser liebe willen [getan], wenne wir adir vnser erben adir nachkomelinge den selben egenantent zcins mogen adir wollen widir koufin, daz mogen wir tūn vmbe vier vnde zewenczig hundirt schog groschin prager muncze, so sal her vnde sin capitel ab nicht byschoffis were adir sine nachkomelinge vns vnde vnsern erben vnde nachkomeligen den zcins widir zcū koufin gebin vnuorczogenlich ane geuerde, vf welche zciit wir den zcins wider koufen mogen, vnde wir sullen ym vnde sine capitel daz selbe gelt viervndezwenczig hundirt schog prager muncze bezalen zcū dem Stolpen adir Nūzsin, adir zcū Mogelin adir zcū Worczin, in welchem slozze vnder den virn er adir sin capitel vnde sine nachkomelinge des zcū rate werden eyntrechtlichin miteynander, wenne bie namen der selbe vnser herre her Johans byschof zcū Mißen daz also gemacht vnde geschickit hat, daz der byschof der nach ym byschof wirt nicht ensal nach enmag daz gelt, vier vnde zewenczig hundirt schog prager muncze alleyne enphahen adir innemen, sundern her sal daz enphan adir